

Visoki predstavnik naglasio ključnu ulogu Agencije za državnu službu u reformi

Agencija za državnu službu BiH će, kroz punu provedbu Zakona o državnoj službi, promovirati razvoj profesionalne, nezavisne, efikasne, apolitične državne službe koja je zasnovana na kvalificiranosti, rekao je danas visoki predstavnik Paddy Ashdown. Visoki predstavnik je govorio na ceremoniji koja je održana u Zgradi zajedničkih institucija u Sarajevu a kojom je obilježen puni početak rada Agencije, nakon procesa zapošljavanja i izgradnje Agencije, koji je trajao nekoliko mjeseci.

Skupu su se također obratili direktor Agencije za državnu službu Jakob Finci, premijer BiH Adnan Terzić i šef Delegacije Evropske komisije u BiH Michael Humphries.

Agencija za državnu službu je odgovorna za transparentno i stručno zapošljavanje državnih službenika na državnom nivou, uključujući i imenovanje vodećih ljudi ključnih agencija i institucija. Njen zadatak je da osigura da se zapošljavanje na pozicijama u državnoj službi vrši na osnovu kvalificiranosti a ne na osnovu stranačkih i političkih veza.

Visoki predstavnik je rekao da u državnim institucijama BiH postoji veliki broj pozicija – uključujući i mjesta članova Sekretarijata Predsjedništva i administrativnog osoblja Stalnog komiteta za vojna pitanja –koje treba popuniti brzo i u skladu sa Zakonom o državnoj službi. Izborna komisija također mora uposliti novo osoblje kako bi obavljala svoju ulogu osnovne agencije koja nadzire provedbu Zakona o sukobu interesa “što će od BiH napraviti jedno od politički najčistijih okruženja na Balkanu”, rekao je visoki predstavnik.

“Državna služba ne može biti teren za protekcionizam,” rekao je. “Početak rada Agencije za državnu službu predstavlja važan praktičan korak ka uvođenju evropskih standarda u BiH. Zajedno sa Zakonom o sukobu interesa i odluci o ograničenju političkog imuniteta, BiH konačno ima zakonski okvir koji će pomoći sređivanju političke scene. Koji će građanima BiH dati evropske standarde koje oni zaslužuju.”

Visoki predstavnik je rekao da su integritet i efikasnost državne službe pitanje koje se tiče svih. “Većina građana direktni kontakt sa organima vlasti ostvaruje upravo putem svakodnevnih kontakata sa državnim službenicima,” rekao je. “Kada se građani vjenčaju, kada kupuju nekretnine, kada vade porodične dokumente, oni kontaktiraju sa državnim službenicima. Upravo zato državni službenici treba da budu u službi ljudi koji obezbjeđuju njihove plaće, a ne da gospodare njima.”

Zaključio je riječima: “Ne možemo donositi zakone zbog kojih građani vole svoju državu. Ali možemo pokušati da dovedemo do toga da država – i, što je ključno, državna služba – bolje služe građanima. Ukoliko uspijemo, vremenom će građani najprije početi da vjeruju a potom i da vole svoju državu.”